

Confeugo 2013

Sciô Scindico,

st'anno chi A Compagna a l'â fæto novant'anni. Emmo festezòu co-in conçerto in ciassa De Ferari davanti a 'n migiâ de personn-e e co-in anullo filatelico ch'o l'â covertò in parte o regalo che A Compagna e tutti i sotoscritoî an fæto a-a çitæ: o restaoro do monumento de Balilla, önô de Portöia. Coscì o 5 de dextembre, co-ina bella çeimônia, l'é stæto torna scoperto o monumento che òua o l'é bello lustro e con l'epigrafe che finalmente a se peu leze senza tanto giamin.

E za che parlo de monumenti son contento de dâ atto a-o Comun che, dòppo in pö de mogogni fæti inti anni pasæ, òua se sta pe rimette in pê, li dov'o l'ea, o monumento dedicòu a-o Raffaele De Ferrari. Finio o restaoro do bronzo aviemmo torna o piâxéi de poei amirâ o monumento dedicòu a 'n grande benefatô de Zena e do seu pòrto.

Insomma A Compagna a l'é stæta fedele a-o seu mòtto: *Dictis facta respondent*: i fæti corispondan a-e paròlle.

Vegnimmo òua a-i mogogni. Doe son e cöse che veuggio dî. E no parliö de tasce: tutti, i çitadin comme o Comun, semmo spremûi comme l'uga into tòrcio, ò meglio, comme i raspi into tòrcio perché de sugo òrmai no ghe n'é ciù!

Pe primma cösa veuggio parlâ de Paganin. Questo chi o l'é o terso anno che ne parlo e ne parlo pe doî motivi. A regòrdo do Paganin l'é stæto misso doê lapidi inti Giardin diti de plastica. O pòsto li d'in gio o l'é pròpio mâ tegnuo. Gh'emmo za caciòu zu a caza natale (me domando chi a-o mondo l'avieiva mai fæto): a-o meno poriescimo fâ in bello netezzo la dove son e doe lapidi: levemmo e scrite che inciastran e miâge e demoghe 'na spasâ. Ma a cösa ciù grave a l'é che no se fa ciù o "Premmio Paganin". O l'é 'n premio internazionale ch'o se fa dò-u 1954, avoxòu in tutto o mondo, in önô pe-i muxicisti poei concorî e poei sunâ o violin do grande Maestro. I costi, m'é stæto dito, no son coscì erti (a parmi saian 300.000 eori co-in bilancio do Comun de 1 miliardo e 600 milioin: meno do 0,02% !) e l'immagine mondiale da çitæ a ne goagnieiva pe coscì. Perché, sciô Scindico, se lascia moî 'na manifestaçion coscì inportante e coscì zeneize?

Comme segunda cösa veuggio parlâ de Zena. Sciâ mò-u lasce dî: Zena da 'n pö de tenpo in sa a l'é pròpio sucida! E no son solo mi a dilo: savendo ch'avieiva parlòu con Vosciâ tante de personn-e m'ân spronòu a dî ste cöse chi. E davei gh'é rumenta da tutte e parte, anche inte nostre stradde ciù belle. Tanti menissi de papê, plastica, botigette, tòcchi de veddro e tante atre cöse che basta amiâ 'na stradda quæ se sæ pe vedile. Scinn-a chi a-o Paxo, ch'o l'é o bigetto da vixita da çitæ, gh'é spòrco. E stradde ödôan e no de bon, ma de spussa! Specce chi beive bira pöi o se deve descaregâ e o fa sto serviçio dove ghe pâ arenbandose a 'na miagia qualunque. Sciâ l'amîe, no l'é mæ intençion criticâ chi lòua a l'Amiu: de sòlito son personn-e che çercan de tegnî polito. Però o l'é 'n fæto che a çitæ a l'é spòrca, ma pròpio tanto. Saiâ

che e gente son mâducæ, saiâ che chi vive de neutte o pensa solo a inbriægâse, saiâ che no gh'è in cian eficente pe polî e stradde, fæto sta che Zena a l'è sucida! E òua manco ciù i bezeugni di chen vegnan arecugeiti! Vedde Zena coscì mâ reduta me fa strenze o cheu. Sciâ fasse anche voscià comme i dûxi da Republica che quande gh'ea da inandiâ quarcösa pò-u ben de Zena no se son mai tiæ inderê. Ghe contemmo!

Tanti ouguri e scignorîa a Voscià e a tutti. Pe Zena e pe San Zorzo!